

**Godin Akam Inigha Izir  
Gumazim  
Maikan Akınafarim  
O  
Maika  
Akar faragha zuim**

Godin akam inigha izir gumazim Maika, Godin akam inigha izir gumazim Aisaian dughiamin, a uaghan Godin akam akuri. Ezi Aisaia Jerusalemian gumazim, egha an akam isa gumazir aruabav kiri. Akam inigha izir gumazim Maika, a Judan nguibar dozir mam Moresetin ize. A kamaghin gumazamizibav gei, me akirim God gasaragha arazir aghuiba ataki, kamaghin amizi, a mizazim me gasam.

Maika inigha izezir akar mabar tongin, akar dikirizir aghuir maba uaghan iti. A ghaze, God gin bar deraghvira uan gumazamizibar amuam. A Devitin ikizimin gumazitam amiseveghtima, an arazir aghuibar gin mangi me gativagham.

Maikan akar otevir mam, akam inigha izir gumazir aviriba mikemezir akabar mingaribar mirara ghu. Akar kam kamakin, “Ikiavira Itir God arazir aghuibar e mikemegha gifa, eghti e arazir aghuir a ifongezir kabara damu: E guizin arazibara damuam, egh igharaz darazir apangkuvir arazim gifongegh, egh e uari abin uan Godin apengan iki, anarira gin mangam.” Akar kam, Maika 6:8in iti.

## God izezir kuram isi uan gumazamizibar aningam

*(Sapta 1--2)*

<sup>1</sup> Fomira Atrivim Jotam ko, Atrivim Ahas ko, Atrivim Heskia me vaghvagha Judan gumazamizibagh ativagha men atrivibar ikezir dughibar, Ikiavira Itir God migirigiar kam isa Maika ganingi, Maika a Moresetin nguibamin gumazir mam. Ikiavira Itir God Samarian nguibar ekiam ko, Jerusalem in nguibar ekiam in otivamin bizibar gun Maika migei.

*God jasin min izi mizazim Samaria ko Jerusalemia daningam*

<sup>2</sup> Ia kantriba bar dar gumazamiziba, ia deraghvira akar kam baragh!

Ia nguazimin itir gumazamiziba, ia deraghvira kuariba arigh Ikiavira Itir God in akam baragh!

Ikiavira Itir God, ian Ekiam, a ia isa kot gatigha gifa.

Ezi ia deraviram oragh.

Ekiam uan Dipenimin ikia migirigiar kam gami.

<sup>3</sup> Ia gan! Ikiavira Itir God uan Nguibar Aghuim ategh izasa.

A izighiri mighsiabagh isin daruam.

<sup>4</sup> Eghti mighsiaba an suemningin apengan dipabar min otivigham,

---

**1:1:** 2 Atriviba 15:32-38; 16:1-20; 18:1-20:21; 2 Eghaghaniba 27:1-7; 28:1-27; 29:1-32:33

mati kendel isia amera izaghira dipamin min emiri.  
 Mighsiar kaba, iri danganir zaribar otivigham,  
 eghti dagiaba pogh-pogh izighiri,  
 mati dipam mighsiabar ikegha ivemara izaghiri.

<sup>5</sup> Israelia, me Godin akam batuegha arazir kuram gami,  
 kamaghin amizi, bizir kaba bar me bativam.  
 Israelia akam batozir arazir kam, kar ten osimtizim?  
 Samariaba, kar ian osimtizim.  
 Ezi Judaba asebar ziaba feir arazir kam, kar ten osimtizim?  
 Jerusalemia, kar ian osimtizim.\*

<sup>6</sup> Kamaghin amizi, Ikiavira Itir God ghaze,  
 “Ki Samarian nguibar ekiam gasighasigh,  
 an mizumzuiariba azenan dar pozim mikinigham.

Eghti a wainin biar igiaba oparamin danganimin min otogham.  
 Ki an dipeniba bar da apirarighti, da dagiar muziaribar otivigh ikiam.

Eghti dagiar muziarir kaba iri pogh-pogh danganir zarimin magari,  
 dipenibar danganir faragha ikeziba avaraghan kogham.

<sup>7</sup> Eghti ki asebar marvir guaba abighirarigh, da isi avimin da kunigham.

---

\* **1:5:** Samarian nguibar ekiam, a kantri Israelin nguibar ekiam mam. Ezi Jerusalem in nguibar ekiam, a kantri Judan nguibar ekiam mam.

Eghti marvir guar kaba bizir mizumzuiarir  
 pozim mikinizibar min otivigham.  
 Samariaba akirim ragha God gasaragha aser  
 kabar ziaba fe,  
 mati amizim uan pam ategha gumazir  
 igharaziba ko tintinibar akui.  
 Bizir kam bangin, igharaz darazi izi Samariaba  
 abinigh,  
 bizir me arazir kuram gamua iniziba, me me  
 da, bar ada inigham.  
 Bizir kaba me da inigh kantrin  
 igharazibar mangegh da isi uan asebar  
 aningam.”

<sup>8</sup> Ezi Maika kamaghin migei:

“Bizir kaba otivam, eghti nan navim bighti ki  
 aziam.

Ki uan osimtizir kam akakaghsi dagarir  
 asuabar aghuan kogham,  
 ki pura inir kurar bibiziba ikiam.

Egh ki afiar atiabar min arongam.

Egh ki ponemin min arangam.

<sup>9</sup> Eghti Samarian gumazamizibar osimtizim,  
 mati midir puvatizir duaba.

Eghti Judaba, uaghan kamaghira  
 mizazim iniam.

Jerusalem, kar nan gumazamizibar nguibam,  
 a mizazim iniamin dughiam uaghan bar  
 roghira izi.”

*Apaniba Jerusalemın boroghira ize*

<sup>10</sup> Getin nguibamin itir gumazamiziba, me en  
 apaniba, ezi ia kamaghin me mikiman  
 marki,

God e gasighasiki,  
 me ian ganti, ia azenara azian marki.  
 Ia Bet Leafran adarasi, ian naviba osemeghti ia  
 azi,  
 nguazim gipoghpogh, an mineziba uan  
 mikarzipar aghu.†  
 11 Ia Safirin nguibamin gumazamiziba, ia bibi-  
 abara ikiva aghumsigh,  
 kalabuziar gumazamizibar min kantrin  
 igharazimin mangi.  
 Ia Sananin nguibamin gumazamizibar atiatigh,  
 nguibam ategh  
 azenan izan kogham.  
 Ia oraghti, Beteselin nguibamin adarazi arangti ia  
 fogh,  
 mongamin danganitam kagh itir puvati.‡  
 12 Ikiavira Itir God Jerusalem gasighasighamin  
 dughiam bar roghira ize,

---

† **1:10:** Bet Leafran nguibar ekiam ko nguibar igharaziba ko nguazir ves 10-15in itiba, da Jerusalem in nguibar ekiam in borogh in iti. Apaniba Jerusalem in misoghs i mangi nguazir kam ko nguibar kam in otogh mangam. Gumazir maba ghaze, akam in igha izir gumazim Maika ti akar kam, pura ikararer dibovir akabar a gamua ziar kam a gati. Hibrun akam in ziar kam, Bet Leafra mong kamagh in ghu, “Nguazir menemeniar dipenim.” Kamagh in amizi, akam in igha izir gumazim kamagh me migia ghaze, me nguazir minemeniam uan mikarzipar aghuam. Ziar kam Sanan (a ves 11 in iti) a mong ziar kam in min ghu “Anetaki.” Ezi akam in igha izir gumazim men migia ghaze, me uan nguibar kam ategham. Akam in igha izir gumazim uaghan ziar igharazir maba kamaghira ikararer dibovir akabar da gei. Ezi Hibrun akam danganir maba me deragha dar mingariba abighizir puvati. ‡ **1:11:** Hibrun akam in me akam in mingarim kagh deragha anebighizir puvati.

kamaghin amizi, Marotin nguibamin  
 adarazir naviba bar osemegha,  
 uarir akurvaghasa gumazamiziba bagha  
 pura mizua iti.

<sup>13</sup> Ia Lakin nguibamin adarasi, ia Israelian arazir  
 kurabar gin ghua,  
 Jerusalemia gamizi, me arazir kuram gami.

Kamaghin amizi, ia karisba inigh  
 hoziar bar puvira ivemaribagh ikegh aregh.

<sup>14</sup> Ia Judaba, ia Moreset Getin nguibamin  
 apangkufigh.

Ia ganti, igharaz darazi a inighti, a ua ian  
 nguibam gavaghan kogham.

Eghti Aksipin nguibamin adarasi,  
 Israelian atrivibar akuraghan kogham.

<sup>15</sup> Ezi ia Maresan nguibamin adarasi, Ikiavira Itir  
 God,

ia isi ian apanibar dafarim datighti,  
 me ian nguibam inigham.

Eghti Israelian gumazir dapaniba ari mangi,  
 Adulamın dagiar toribar aven muegham.

<sup>16</sup> Egh apanir kaba ian borir ia bar ifongeziba  
 inigh mangegham.

Kamaghin amizi, ia me bagh nighnigh azi,  
 egh uan dapanir arizibagh isegh dapanir  
 tuziba ikiam.

## 2

*Gumazir arazir kurabar gumazir onganaraz-  
 ibagh amiba, God me gasighasigham*

<sup>1</sup> Ia gumazir dimagaribar akui puvatigha, arazir  
 kurabar amuasa nighnigha itiba,

aminim tirazi arazir kurar kam damuamin  
tuavim otozi, ia zuamirama a gami.

Ia kamaghin amir gumazamiziba iavzika!

Ia bar ikuvigham.

<sup>2</sup> Ia gumazamizibar azenibar gara dagh ifuegha  
purama da isi darasi.

Egha ia men dipenibar gara dagh aguava pura  
da isi.

Ia ifavaribagh amuva,

gumazamizibar nguaziba ko, biziba ko,  
dipenibar okei darasi.

<sup>3</sup> Kamaghin amizi, Ikiavira Itir God kamaghin  
miglia ghaze,

“Ia oragh! Ki ia gasighasighasa nighnisi,  
eghti ia ari mangamin tuaviba puvatigham.

Dughiar kurar kam ia batoghti ia ganigh fogham,  
egh ia ua gin, uan ziaba fisi kamaghin damuan  
kogham.

<sup>4</sup> Ia bativamin bizir kaba otivti,  
gumazamiziba ia geghan akam ia gasi ia  
mikimam.

Egh me kamaghin azirakar ighiar  
amirizibar amuam:

‘E bar moghira bar ikufi.

Ikiavira Itir God, en nguazim inigha en apanir  
igharazibagh aningi.

Gumazir kaba e inigha ghua

nguazir igharazimin e isa kalabus gati.

Maia! A datirighin manmaghin

en nguazir, e da inizim ikarvagh e  
damuam?’ ”\*

---

\* **2:4:** Hibrun akamin me akamin mingarim kagh deragha  
anebighizir puvati.

<sup>5</sup> Kamaghin amizi, ia Ikiavira Itir Godin gumazamiziba, ia gin ua izi uari akuvagh,  
 nguazim abigh uari daningisi, a bagh satu  
 gikarangamin dughiam,  
 ia gumazir arazir kurabagh amiba,  
 ian ovavir boriba nguazir otevir katam  
 inighan kogham.

<sup>6</sup> Ezi gumazamiziba kamaghin na migia ghaze,  
 “Ni kamaghin garir akabar gun e mikiman marki.  
 E nin akaba baraghan aghua.  
 God e gasighasighan koghti, e  
 aghumsighan kogham.”

<sup>7</sup> Ia Jekopin ovavir boriba, ia ghaze,  
 Ikiavira Itir Godin apangkuvim ia ko ikivira  
 ikiam, a?  
 Egh bizir kuratamin ia damighan  
 kogham, a? Puvati.

Ikiavira Itir God ghaze,  
 gumazir nan damazimin arazir aghuibagh  
 amiba,  
 ki nimira me migei.

<sup>8</sup> Ikiavira Itir God kamaghin gumazir kabav gia  
 ghaze,  
 nan gumazamiziba, ia apanibar min me gami.  
 Men marazi midorozim gamigha uamategha uan  
 dipenibar izegha ghaze,  
 e deragha uamategha izegha avughsi.



Ezi puvati, ia ghua me azenan azuir koro-  
tiaba men akiragharibar da adangi.†

9 Egha ia nan gumazamizibar tongin itir amizir  
odiariba,

ia men dipenir me ifongeziba bagha me  
batosi.

Egha ki men boriba, gin me daningamin bizir  
aghuiba,

ia men tuavim apirigha da okemegha gifa.

10 Ia gumazir arazir kurabagh amua nan  
damazimin zuezir puvatiziba,

ia kagh deravira ikiamin danganir aghuiba  
puvatigham.

Ki bar pazavira ia gasighasigham.

Kamaghin amizi, ia dikavigh mangi.

11 Eghti akam akurir gumazitam ti gumazir kurar  
kaba bagh izi,

wainin dipar onganiba ko dipar onganir  
igharazibar akar ifavaribar mikim suam,

“Ki guizin kamaghin migei, ia wain ko dipar on-  
ganir aviriba ikiam,”

gumazir kurar kaba, ti gumazir akam inigha  
izir kam bar a gifuegham.

*Ikiavira Itir God uamategh uan gumazamiziba  
iniam*

12 Ikiavira Itir God ua kamaghin Jekopin ovavir  
boribav gia ghaze,

“Ki uamategh Israelian gumazamizir itir varazira  
ua me akuvagham.

---

† 2:8: Hibrun akamin me akamin mingarim kagh deragha  
anebighizir puvati.

Egh mati gumazim sipsipba inigha iza  
divazimin aven me akuvi moghin,  
ki ua me akuvagham.

Eghti me kalabusin dipenibar tiar akabar uari  
akuvam.

Eghti gumazamiziba ua ian nguazim bar a  
gizivagham,  
mati sipsipin avirim grazir aghuir aviribar  
tongin ikia ada api.”

<sup>13</sup> Ikiavira Itir God uan gumazamiziba kalabusin  
me firigh,  
me inigh azenimin izam.

Eghti me kalabuziar divazibar tiar akaba akar  
azenan iziti,  
men Atrivim a Ikiavira Itir God, a uabi men  
faragh mangam.

## **God gumazamizibar araziba akir, deragh me damuam**

### **3**

*(Sapta 3--5)*

*Maika Israelian gumazir dapanibar atari*

<sup>1</sup> Ki ghaze:

“Ia oragh, ia Jekopin ovavir boribar gumazir da-  
paniba, ia Israelian gumazir aruaba,  
ia arazir aghuibagh nighnigh da bagh ingar.

<sup>2</sup> Ia arazir aghuir kamın aghuagha arazir kuram  
bagha bar ifonge.

Ian arazir kaba mati, ia nan gumazamizir  
angamira itibar iniba aghora da misi.

Egha men agharibar itir tuziba aghora da  
mifeſi.

<sup>3</sup> Ian arazir kaba mati ia nan gumamazibar iniba  
misa men aghariba apiragharigha  
dagh asegha, men tuziba aghoraghsua da api.  
Ia mati, me minem daghuasa asizir tuzir  
agharibar itiba aghoraghsuegha  
da minem gaghui.

<sup>4</sup> Eghti dughiatam gin iziti, ia akurvazim bagh  
Ikiavira Itir Godin arangti,  
a ia bareghan kogham.  
Ia arazir kurabagh ami, kamaghin amizi, a ian  
azangsiziba bareghan kogham,  
mati a uan guam ian modo.”

<sup>5</sup> Godin akam inigha izir gumazir maba,  
deragha nan gumamazibagh amir puvati.  
Eghti tav dagheba me daningti, me a ko akaba akir  
suam,  
a dughiar aghuibar ikiam.  
Puvati, kar me a gifari.

Eghti gumamaziziba dagheba me danighan  
kogham, eghti me akar atiatibav kim ifar  
suam,  
men apaniba izi me gasighasigham.

Ezi Ikiavira Itir God, akam inigha izir gumazir  
kabav gia ghaze,

<sup>6</sup> “Ia nan gumamazibagh ifari,  
kamaghin amizi, ki ian anogoreghti,  
ia ua irebamin min gari bizibar ganan  
kogham,  
egh dar mingariba abighan kogh,

egh ia g'in otivamin bizibagh foghan kogh,  
dav kiman kogham.

Ia aruem iraghugha g'ivagha aminim pirizi  
mogh'in,  
ian dughiaba g'ivagham.”

<sup>7</sup> Eghti akam inigha izir gumazir g'in otivamin  
bizibar gara dav geir kaba,  
me aghumsigh naviba men ikuvigham.

Men arazir kurar kam bang'in, God men  
azangsiziba baraghan kogh,  
bizir me ganamin kabar amuti,  
da otivan kogham.

<sup>8</sup> Ezi ko, Ikiavira Itir Godin Duam gavgavim na  
ganingi,  
egha guizin arazim damuasa nighnizim isa na  
ganingi.

Egha Israelian arazir kuraba bar dar gun me  
mikimasa gavgavim na ganingi.  
Eghti ki Jekopin ovavir boribar arazir akaba  
batozim'in gun me mikimam.

<sup>9</sup> Ia Jekopin ovavir boribar gumazir dapaniba de-  
ragh na baragh,  
ia guizin arazibar aghua.

Ia Israelian gumazir aruaba, ia arazir aghuibagh  
irazi,  
da ghua arazir kurabar m'in otifi.

<sup>10</sup> Ia uari bagha Saionin nguibamin dipenir aghuir  
aviriba ingarasa,  
gumazamizibav sozi me ariaghiri.

Ia guizin arazimin aghuagha, onganarazibagh  
 amir gumazamiziba abiragha men ghuzim  
 ingegha  
 ghaze, kar Ikiavira Itir Godin nguibam  
 Jerusalem,

e anesarazi a tugha gavgafi.

11 Ezi Jerusalemın gumazir dapaniba kotin  
 dughiamın, gumazamizibar amamangatizi,  
 me modogha dagiaba me givezegha me gak-  
 aghorima,  
 me paza kotiaba tuisisi.

Ezi ofa gamir gumaziba, gumazibar amaman-  
 gatighti me dagiaba me daningti,  
 me Godin Akar Gavgavibar mingariba abigh  
 me mikimam.

Ezi akam inigha izir gumaziba uaghan ghaze, me  
 dagiaba inighiva,  
 akar mogomebar mingariba deragh da  
 abigham.

Jerusalemın gumazir ekiar kaba bar, me kam-  
 aghın amua ghaze,  
 “Ikiavira Itir God e ko iti. Ezi bizitam e  
 gasighasighan kogham.”

12 Kamaghın amizi, ia gumazir dapaniba ko ofa  
 gamir gumaziba ko akam inigha izir gu-  
 maziba,  
 ia amizir osimtızir kaba bangin, God  
 Jerusalem gasighasigham.

Eghti Jerusalemın biziba bar ikuvigham, egh  
 minezir pozimin otogham.

Eghti Saion nguazir kinimin min ikiti, gumaz-  
 iba an dagher azenibar ingaram.  
 Eghti Ikiavira Itir Godin Dipenim iti naghin  
 mighsiar kam,  
 ruarim a batogham.

## 4

*Ikiavira Itir God uan gumamaziziba bar men  
 atrivimin ikiam  
 (Aisaia 2:1-4)*

<sup>1</sup> Gin otivamin dughia tamın,  
 mighsiar Ikiavira Itir Godin Dipenim tughav  
 itim,  
 ziar bar ekiam iniam.  
 Egh a pin mar iki mighsiar igharaziba bar dagh  
 afiragham.  
 Eghti Kantrin Igharazibar Gumamaziziba bar  
 izi an uari akuvagh ikiam.

<sup>2</sup> Kantrin aviribar gumamaziziba izi suam,  
 “Ia izi, e Saionin Mighsiamin mavanangam, a  
 Ikiavira Itir Godin mighsiam.  
 Kar Jekopin Godin Dipenim.  
 E mangiti a uan arazir a ifongezibar en sure  
 damuam.  
 Egh a uabi misevezir tuavim, e an gin  
 mangam.”  
 E fo, Moses Osirizir Araziba, Saionin Mighsiamin  
 ikegh mangiti  
 gumamaziziba a iniam.  
 Guizbangira, Jerusalemın nguibam, kar danganir  
 Ikiavira Itir God uan akam isi, uan gumaza-  
 mizibar aningamim,  
 eghti me azenan mangi an akam akunam.

- <sup>3</sup> Eghti Ikiavira Itir God, jasın mın iki kantriba bar dar gumamazibar araziba tuisigh, men osımtıziba deragh da akirti, me uari inigh deragh ikiam.  
 Egh me uan midorozir sababa inigh dav soghti, da baravigh nguazibagh tuir ainbar mın otivigham.  
 Egh me uan afuzibav soghti, da ikizirigh sabar azenibar ingaribagh ami moghin, otivigham.  
 Egh danganiba bar dar itir gumamaziziba, uam uariv soghan kogh ikıva, ua midorozir arazibar sure damuan kogham.
- <sup>4</sup> Kar Ikiavira Itir Godın Gavgavıba Bar İtim akam akırigha ghaze, gumamaziziba vaghvagh deraghvıra uari uan wainın ikarıziba ko fighın temebar boroghın dapiam.  
 Egh me deragh ikiti, tav ua izi atiatim me danıngan kogham.
- <sup>5</sup> Kantrin Igharazibar Gumamaziziba uan asebar ziaba fi, men akabar gın mangam.  
 Eghti e Israelia, Ikiavira Itir God, en God, e zuraram an ziam fi mamaghıra ikiam.

*Israelia uamategh uan nguıbamın izam*

- <sup>6</sup> Ikiavira Itir God kamaghın miğia ghaze,  
 “Gın otivamin dughiamın, gumamazizir ki faragha ivezir kuram me ganıga, kalabuziar gumamazizibar mın kantrin igharazımın amadaziba ko, suer kurar daruan iburaziba,

kí ua me akuvam.

<sup>7</sup> Ezi gumazamizir ikiavira itir varazira, me uan nguibamín saghon ikia, egha daruan iburaghburaki, me gumazamizir suer kurar pazava aruiba.

Ezi datirighín itir varazira kí ua me damighti, me kantrin bar gavgavimín mín otogham.

Eghti datirighín ikegh mangi, kí Ikiavira Itir God, kí Saionín Mighsiamín iki, men atrivimín iki, me gativagh mamaghira ikiam.”

<sup>8</sup> Ezi ní Jerusalem, God nín ikia uan gumazamiz-ibar gari, mati sipsipbar gari gumazim uan sipsipbar garir dipenir divazimín aven iti.

Ní faragha me geghuvi moghín, ní bar ekevegh uan kantrin nguibaba bar da gativagh, dagh eghuvam.

<sup>9</sup> Jerusalem, ní manmaghsua pamten arai? Ní tizim bagha amizim borim batasa mizazim isi moghín uabi barasi?

Ní ti atriviba puvati, a? Ezi nín fofozir gumaziba ti ariaghire, a?

<sup>10</sup> Ia Jerusalemia, ia dimiva arang, mati amizim borim batasa mizazim baragha, uabi gighavkiravira iti.

Ia datirighín nguibam ategh graziba itir danganimín mangi.

Eghti me ia inigh Babilonín mangam. Eghti gín Ikiavira Itir God, ian apaniba da ua ia inigham.



- 11 Ezi kantrin aviriba ia gasighasighasa uari akufa.  
Egha me ghaze,  
“Aria, e Jerusalemın nguibar ekiam bar a  
gasighasigh,  
an ganti a bar ikuvigh ikiam.”
- 12 Egha kantrin kabar gumazamiziba Ikiavira  
Itir Godın nighnizim gifozir puvati, a man-  
maghin nighnisi.  
Me kamaghın fozir puvati, a me akuvagh me  
gasighasigham.  
Mati gumazim witba akuvagh da mirmirighti,  
da witin daghebar mın otivigham.

- 13 Egha Ikiavira Itir God ghaze,  
“Jerusalemia, ia dikavigh  
mangi uan apanibagh asighasigh.  
Ki ia damighti, ia gavgavigh ikiam,  
mati bulmakaun mam ainın komba ko, brasın  
sueba ikia bar gavgafi.  
Kamaghın amizi, ia kantrin aviriba diki me  
abinigham.  
Egh apaniba faragha ia misogha inizir biziba,  
ia uam ada inigh na danıngam,  
ki nguazir kam bar a gativazir Ikiavira  
Itir God.”

## 5

- 1 Ia Jerusalemia, ian midorozir gumaziba uari  
akuvagh,  
arang uan mikarziba aghor.  
Apaniba ia ekiarugha gifa.  
Me Israelian gumazir dapanim misogh  
aghumsizim a danıngasa,

mati apanim aghorim inigha gumazimîn  
koviam miſoke.

*God akam akîra ghaze, gumazir dapanitam  
Betlehemîn nguibamîn otivam*

<sup>2</sup> Ikiavira Itir God ghaze,

“O Betlehem, ni Efratan Distrighîn itir nguibam,  
ni Judan anababar nguibabar tongîn, ni  
nguibar bar dozim,  
ezi nîn aven gumazitam na bagh gumazir  
dapanimîn otogh Israelia gativagh men  
ganam.

Ezi bar fomira, an ovavir bar faraghavira itim, an  
otogha ike,  
ezi an adarazi datirighîn ikia ghuavira iti.”

<sup>3</sup> Kamaghîn amizi, Ikiavira Itir God uan adarazi  
ateghti,  
me uan apanibar dafaribar ikivira iki mangiti,  
amizir God inabazim, an otarim  
bategham.

Eghti dughiar kamîn Israelian kantrin igharaz-  
ibar ikeziba, uamategh izi  
uan adarazi ko uam uari akuvagham.

<sup>4</sup> Eghti gumazir dapanir kam otogh,  
uabi uan gumazamiziba Ikiavira Itir Godîn  
gavgavimîn men ganam,  
mati sipsipbagh eghuvir gumazim de-  
ravira uan sipsipbagh eghufi.  
Guizbangira, a Ikiavira Itir God, an God, an an  
ziar ekiamîn me gativagham.

Eghti gumazamizir kantrin igharazibar itiba an  
gavgavim gifogham.

Eghti an gumazamiziba deragh ikiam.

<sup>5</sup> Eghti a navir amirizim ko, dabirabir aghuim isi  
uan gumazamizibar aningham.

Eghti Asirian midorozir gumaziba izi, en  
nguibar ekiar gavgavibar divaziba akarti,  
e uan midorozir gumazir faragha zuir gavgaviba  
amiseveghti,  
me mangi me ko misogham.

<sup>6</sup> Me Asirian kantri ko misogh me abinigh,  
men kantri iniam, an ziam Nimrot,\* me me  
dama a iningham.

Eghti arazir kamın, gumazir dapanir kam, Asirian  
e gasighasighasa iziba,  
a men dafarimın en akuragh, uam e iningham.

<sup>7</sup> Eghti Jekopin ovavir boribar ikiavira itir  
varazira,  
me kantrin igharazir aviribar gumazamiz-  
ibar tongin iki,  
men akurvaghamin gumazibar min  
ikiam.

Mati dimagaribar grazibagh irir ghuariaba, ko,  
temebagh izir amoziba,

Ikiavira Itir God da amadagha dagh amizi, da  
deraghaviram otifi.

Bizir kaba me Godin gavgavimra dar amuam,  
men gavgaviba puvati.

---

\* **5:6:** Nimrot, a gumazir Niniven nguibar ekiamın ingarizim, an  
Asiriabar nguibar ekiam. Kamaghın amizi, kantri Asiria, me ziar  
kam a garisi “kantri Nimrot.” Ni Jenesis sapta 10:8-12in gan.

8 Eghti Jekopin ovavir boribar ikiavira itir varazira,  
 me kantrin igharazir aviribar gumamaz-  
 ibar tongin iki,  
 mati laion ruarimin itir asiziba ko,  
 sipsipin divazimin aven itibar amasa  
 gari.

A sipsipbar tongin mangi, uabi fi sipsipbav kin me givi me aghoram.

Eghti gumazir men akurvaghamiba puvatigham.

9 Eghti tuavir kamin Israelia uan apaniba abinigh bar me agivagham.

10 Ikiavira Itir God, kamaghin Israelia migia ghaze:  
 “Gin otivamin dughiamin, ki midorozir bizibagh asighasigham.

Egh ian hoziabagh asighasigh ian karisba apirarigham.

11 Egh ki ian nguibar ekiaba ko dar divazir gavgav-  
 iba bar ada akarighti,  
 ia uam adar mongiva avegham.

12 Egh ki ian meziba ko akavsiaba batuegh,  
 ian kukunir gumaziba agivaghti, me ua ikian kogham.

13 Egh ki ian marvir guaba ko, asebar nedaziba bar da batuegham.

Ia uari uan dafaribar ingarizir bizibar ziaba fan marki.

14 Egh ki temer guarir aser amizim Aseran nedazim itiba apirarigh,  
 ian nguibamin bar da batuegham.

Egh ian nguibar ekiaba bar adagh  
asighasigham.

<sup>15</sup> Ki arazir kam bagha nan navim bar osemegha  
atari.

Egh kantribar gumamazir nan akaba ba-  
tozir arazir kam, ki a ikarvaghám.”

**God Israelian arazir kurar me  
amiziba bagh me tuisigh, gín me  
damighti me an gumamazibar  
otivigham**

## 6

*(Sapta 6--7)*

*Ikiavira Itir God Israelia isa kot gati*

<sup>1</sup> Ia oragh!

Ikiavira Itir God Israelia isa kot gati.

O Israelia, ia dikavigh izi kotiamin, ia uan  
osimtizimin gun mikim.

Eghti mighsiaba jasin min iki,  
ia baragh ian akaba tuisigham.

<sup>2</sup> Eghti ia mighsiaba ko, dagiar bar gavgavir  
nguazimin apengan ikia, an suirazi a gav-  
gavigha ikia mamaghira itiba,  
ia Ikiavira Itir Godin kotiam baragh.

Eghti Ikiavira Itir God, kotin aven uan gumaza-  
miziba ko uari adoghodoghiva,  
egh an akam me gasam.

<sup>3</sup> Ikiavira Itir God kamaghin migei,

“O nan gumazamiziba, ki arazir kurar manamra ia gami?

Ki ian azai, ki bizir tizim gamigha osimtizim ia ganingi?

Ia na mikim!

<sup>4</sup> Guizbangira, kirara dughiar ia Isipin kalabusin itimin ia inigha azenan ize.

Ki tuavim ian akaghasa, Moses ko, Aron ko, Miriam, me amadazi, me ian faragha ghua ia inigha ize.

<sup>5</sup> O nan gumazamiziba, ia Moapian Atrivim Balak faragha ia gamizir arazir kuram ginighnigh.

Beorin otarim Balam, ia Balak mikemezir akam ginighnigh.

Egha ia Sitimin nguibam ategha ghua Gilgalin zuir dughiamin, ki amizir bizir ekiabagh nighnigh.

Ia bizir kabagh nighnigh fogh suam, ki ian akurvaghasava bizir aghuibagh ami.”\*

*Ikiavira Itir God, arazir a ifongezibar amuasa gumazamizibav gei*

<sup>6</sup> Ikiavira Itir God, a Godin Bar Pin Itim, ki an damazimin izi tevimning apirigh an ziam fisi, bizir tizimra inigh izam?

---

**6:4:** Ua Me Ini 4:10-16; 12:50-51; 15:20      **6:5:** Diboboniba 22:2--24:25; Josua 3:1--4:19      \* **6:5:** Vezin kam ghaze, Ikiavira Itir God digavir kuram gamir arazir aghuir aviribagh ami. Israelia Sitimin nguibam ategha izir dughiamin, a Jordanin Fanem gamizi a dakezi me nguazir dakirtizim giregha vongin Gilgalin ghue.

Ki ti bulmakaun igiar mikarziba sara itir aghuiba  
 inigh izi, a daningisi  
 ofan bar isia mighirizim min bar da tueghti da  
 isi mighirigham, a?

<sup>7</sup> Ki ti sipsipin apurir 1,000pla o, 10,000plan olivin  
 borer mineba inigh izam,  
 eghti Ikiavira Itir God bizir kaba bagh bar  
 akuegham, o?

Ki ti uan arazir kuramin ivezim bagh uan otarir  
 ivariam ofa damusi  
 a misueghti an aremegham, o?  
 Bar puvatigham.

<sup>8</sup> Ia nguazir kamın itir gumamaziziba, Ikiavira Itir  
 God arazir aghuibar ia mikemegha gifa,  
 eghti ia arazir aghuir a ifongezir kabara dar  
 amu:

Ia guizin arazibara damuam,  
 egh igharaz darazir apangkuvir arazim gi-  
 fongegh,  
 egh ia uari abin uan Godin apengan iki,  
 anarira gin mangam.

<sup>9</sup> Ia fofozir aghuim gifueghiva,  
 Ikiavira Itir Godin atiating an apengan ikiam.

Ia oragh! Ikiavira Itir God Jerusalemın nguibar  
 ekiamın diagha ghaze,  
 “O nguazir kamın itir gumamazizir iza  
 nguibar kamın uari akuviba, ia oragh!†

<sup>10</sup> Ia gumazir arazir kurabagh amiba,

---

**6:8:** Godin Araziba 10:12; 1 Samuel 15:22; Aisaia 1:17; Hosea  
 6:6 † **6:9:** Hibrun akamin me akamin mingarim kagh deragha  
 anebighizir puvati.

ia bizir aghuiba uan dipenibar aven da mon-  
gezi da ikiavira iti,  
ezi bizir ia itir kaba, kar ia arazir kuram  
gamua inizir biziba.

Ia uan biziba gumazir igharaziba bagha da  
amadir dughiam,  
ia ifara deragha dar osimtiziba tuisigha dar  
ivezibar abarir puvati.

Ki arazir kurar kam bar an aghua.

11 Ki garima, ian gumazir maba igharaz darazigh  
ifara men bizir amadiba,  
deragha dar osimtizar iveziba me ganidi  
puvati.

Ki men arazir kuraba gin amadir puvati.

Ki aghua.†

12 Ezi nguibar ekiamin itir gumazir dagiar aviriba  
itiba,  
me onganarazibagh amir gumazamizibagh  
ifara men biziba pura dagh ekua,  
egha paza me gami.

Nguibar ekiar kamın gumazamiziba,  
me bar ifavarir gumazamizibara.

13 Kamaghın amizi, ian arazir kurar kaba bangın,  
ki ia gasighasigham.

14 Ia daghebar ami, izivaghan kogham,  
eghti mitiriaba ian aghivira ikiam.

Egh ia biziba inigh dipenimin ada akuvam,  
eghti da deravira ikian kogham.

Eghti ia bizir manaba iti, ki apaniba amadaghti,  
me izi ia misogh dagh asighasigham.

---

† 6:11: Hibrun akamin me akamin mingarim kagh deragha  
anebighizir puvati.



- 15 Ia azeniba opariva,  
dar daghetam inighan kogham.  
Egh ia olivin oviziba dikabin da mirmir,  
egh olivin borer tam uan mikarzim  
daghuighan kogham.  
Egh ia wainin oviziba dikabin da mirmir,  
egh wainin dipatam ameghan kogham.
- 16 Atrivim Omri ko an otarim, Atrivim Ahap, ia an-  
ingin arazir kurabar gin ghuezir gumaza-  
miziba,  
aning faragha amizir araziba, ia datirighin  
aningin gin ghua dagh ami,  
kamaghin amizi, ki ia gasighasighti,  
Kantrin Igharazibar Gumazamiziba, akirim  
ragh ia gasi dibovir akabar ia mikimam.  
Eghti ia nan gumazamizir nguibar ekiar kamın  
itiba  
bar moghiram aghumsigham.”

## 7

### *Israelia arazir kurabagh ami*

- 1 Maia! Ki uabin apangkufi.  
Ki ti ovengam.  
Gumazamiziba mitiriaba men azi moghin,  
mitiriam nan azi, ezi ki temer ovizitam amasa  
da bagha tememin garima, da puvati.

---

**6:15:** Godin Araziba 28:30; 28:38-40; Amos 5:11; Sefanaia 1:13

**6:16:** 1 Atriviba 16:23-24; 21:25-26

Temer fighin oviziba ko, wainin oviziba, me  
bar ada inigha gifa.\*

<sup>2</sup> Gumazir aghuitam nan kantrin aven itir puvati.  
Gumazitam guizbangira Godin gin zuir puvati.

Bar puvati.

Dughiabar zurara gumamaziziba uarira uarir  
apanibagh amua uarigh asighasighasa uari  
bagha tuaviba buri,  
mati gumazim asizibav soghasa, azuazim  
agura.

<sup>3</sup> Gumamazizir bar arazir kurabagh fogha dagh  
amiba,  
me zuraram arazir kurabagh ami.

Gavmanin ingarir gumaziba ko, jasba  
kotin dughiamin, me gumamazizibar  
azangsizima,  
me moga dagiabar me giveza me  
gakaghorima,  
me paza kotiaba barasi.

Gumazir ziar ekiaba itiba pura uan ifongiabar  
jashav geima,  
jasba guizin arazim ategha pura gumazir ku-  
rar kabar ifongiabar gin zui.†

<sup>4</sup> Ezi gumazir igharaziba ghaze me deragha arazir  
aghuibagh ami,  
ezi God men gari,

---

\* **7:1:** E fozir puvati tinara akar kam akuni. Gumazir maba ghaze kar akam inigha izezir gumazim Maika, an akamra. Ezi gumazir maba ghaze, akam inigha izir gumazim, a Jerusalem o Samarian nguibamningin amizimin akar isin zuim migei. Ezi akar kam amizir kam akam akuni. † **7:3:** Hibrun akamin me akamin mingarim kagh deragha anebighizir puvati.

me ikuvigha mati grazir ataghatariba ko,  
 benir dikoniba itiba.  
 Dughiam otogha gifa, ezi God uan gumazamiz-  
 ibagh asighasighasa,  
 mati an akam inigha izir gumazim mikemezi  
 mokin.  
 God kamaghin damuti,  
 an gumazamiziba okam nighnigh onganigh  
 tintinibar nighnigham.  
<sup>5-6</sup> Eghti dughiar kamın otariba dibovir akabar  
 uan afeziabav kimti,  
 guiviba uan amebabar akaba batogham.  
 Eghti paba itir amiziba, uan ivozir amebaba ko  
 akabar uari adogham.  
 Gumazamizibar anababa uari, men apanim  
 ikıva, men ikuvigham.  
 Kamaghin amizi, ni uan namakam ko roroamin  
 akaba, nighnizir gavgavim dar ikian marki.  
 Egh ni uaghan uan amuim o uan pam mikimsi  
 deraghvira nighnigh a mikim.  
<sup>7</sup> Ezi ki uabi, nighnizir gavgavim Ikiavira Itir Godin  
 iki a mizuamam.  
 Eghti a ki a ko migeir azir akaba baregh,  
 izi nan akuragh na inighti, ki deraghvira  
 ikiam.

*Ikiavira Itir God ua uan gumazamiziba ini*

<sup>8</sup> Eghti en apaniba aghumsizir akabar e damuan  
 kogham.  
 E guizbangira iregha gifa, egh e ua dikavigh  
 tuivigham.  
 E datirighin aminirbirimin iti,

eghti Ikiavira Itir God uam angazangarim e daningam.

<sup>9</sup> E datirighin Ikiavira Itir Godin damazimin arazir kuram gami.

Eghti Ikiavira Itir God bar dughiar otevimra uan aningagharim akagh, e gasighasigham.

Egh a gin ua en akuragh guizin arazimin gin mangiva,

pazavira e gamir darazir arazir kuraba ikarvagham.

Egh a mitatemin e inigh angazangarimin e atighti, e angamira iki an ganti, an en apanibar dafaribar uam e iniam.

<sup>10</sup> Apaniba faragha kamaghin e migia ghaze, “Ikiavira Itir God, ian God managh iti?”

Egh me gin ganti Ikiavira Itir God en akuraghti, me bar aghumsigham.

E ganti Ikiavira Itir God me dikiti, mati gumazamiziba tuavimin beghneazim diti moghin, a me dikabinigham.

<sup>11</sup> Ia Jerusalem gumazamiziba, ia gin nguibar ekiamin divaziba uam adar ingaramin.

Egh nguazimin mitaghniabagh isivaghti da mangi ekevegham.

<sup>12</sup> Dughiar kam n n gumazamizir kantrin igharazibar kalabusin itiba, me uamategh tintinibar izam.

Tarazi Yufretisin Fanemin amadaghan ikegh izam,

eghti tarazi aruem anadi naghin kantri Asirian ikegh izam,

eghti tarazi sautin amadaghan kantri Isip ategh izam.

Israelia bar moghira kantrin saghon itibar mighsiaba ko, ongarir dadarimin itibar ikegh izam.

13 Ezi kantrin kabar gumazamiziba bar arazir kurabagh ami.

Kamaghin amizi, da danganir bar kurabar min ikiam.

*Ikiavira Itir God, ni Israelian apangkufigh*

14 O Ikiavira Itir God, ni gumazamizir ua bagha miseveziba, ni me eghuvir gumazimin min iki,

mati sipsipbagh eghuvir gumazim deravira uan sipsipbagh eghufi.

Me ruarir arizibar mighsiabar ikia, nguazir aghuiba puvati.

Ezi azenibar ingaramin nguazir aghuiba vin iti.

Me faragha amizi moghin, ni men amaman-gatighi,

me mangi Basan Distrik ko Gileatin Distrighin nguazir aghuibar azenibar ingaram,

mati sipsipba grazir aghuiba itir nguazim garua grazir aviriba api.

15 Ikiavira Itir God akam ikaragha ghaze:

“Ki faragha Isipin ia inigh azenan izasa digavir kuram gamir araziba,

ki datirighin uam ada ian akagham.

16 Eghiti kantrin igharazir gavgaviba itiba, me datirighin nan gavgavimin ganighiva digavir kuram damigh aghumsigham.

Egh me atiatigh uan kuariba ko, akabar kumigham.

17 Egh me fogh suam, me gavgaviba bar puvati, mati kuruziba uan navibar nguazim davaram.

Egh akongiva atiatigh uan danganir mogomeba ategh,  
Ikiavira Itir God bagh izam, a en God.”

18 O Ikiavira Itir God, ua godin igharazitam nin min itir puvati.

Nin gumazamizir ikiavira itir varazira, ni men arazir kuraba gin amadi.

Nin adariba dughiar ruaribar itir puvati.

Ni zurara en apangkuvigha, arazir aghuibar e damuasa bar akonge.

19 Ni uam en apangkufigh.

Egh uan suemin biziba dika da abiri moghin, en arazir kuraba diki da abinigh,  
da akunighti da ongarir konim bar an aven magirigh.

20 Egh ni uan akaba bar dar gin mangiva, zurara Israelia en apangkufigh.

E Abraham ko Jekopin ovavir boriba, e nin gumazamizibara.

Ni fomira en inazir afeziaba koma akar dikirizim gamua ghaze,

ni en apangkuvigham,  
egh ni uan akar dikirizir kam damuti,  
a guizbangiram otogham.

**Godin Eghaghanim: Akar Gavgavir Dikirizir  
Ghurim ko Igiam  
The Holy Bible in the Aruamu language of Madang  
Province, Papua New Guinea, 2020 Edition  
Buk Baibel long tokples Aruamu long Madang Provins  
long Niugini long 2020**

copyright © 2020 Pioneer Bible Translators

Language: Aruamu

Translation by: Pioneer Bible Translators

Contributor: The Seed Company

GOD'S STORY in the Aruamu Language of Papua New Guinea

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-21

---

PDF generated using Haiola and XeLaTeX on 11 Nov 2022 from source files dated 29 Jan 2022

8f6beb37-6783-55d5-91ed-8321cc3f5eea